

**Utoqqalinersiaqarneq pillugu Inatsisartut inatsisaata allanngortinneqarnissaa pillugu
Inatsisartut inatsisissaattut siunnersuut, aamma siusinaartumik pensionisiat pillugit
Inatsisartut inatsisaata allanngortinneqarnissaanut siunnersuut
(Utoqqalinersiaqartunut utoqqalinersiat toqqammaviusut qaffanneqarneri,
utoqqalinersiat qaffasinnerpaat qaffanneqarneri aamma ilanngaassinnginnermi
aningaasat tigungmiinnagassat qaffanneqarneri)
*Isumaginninnermut, Sulisoqarnermullu Naalakkersuisumit saqqummiunneqartoq***

pillugu

**Ilaqutariinnermut Peqqissutsimullu Ataatsimiititaliap
siunnersuutit aappasaaneerreqarnerannut**

ISUMALIUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Eqaluk Høegh, Inuit Ataqatigiit
Inatsisartunut ilaasortaq Mala Høy Kúko, Siumut
Inatsisartunut ilaasortaq Aslak W. Jensen, Siumut
Inatsisartunut ilaasortaq Emmanuel Nûko, Naleraq

UPA2022-imi marsip 23.-ani siullermeerinerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

Matumani siunnersuuteqarnikkut utoqqalinersiat pillugit Inatsisartut inatsisaat siusinaartumillu pensionisiat pillugit Inatsisartut inatsisaat allanngortinneqassapput. utoqqalinersialinnut tamanut tunngaviusumik 9.000 kr.-inik amerlineqarnissaannik siunnersuut kinguneqassaaq, tassa kisimiittunut katissimanatik inooqatigiittunut.

Siusinaartumik pensionisiat pillugit Inatsisartut inatsisaanni allannguutit appasinnerpaamik sulisinnaassusillit qaffasinnerpaamik annertussusilinnik tigusaqartalernissaannik kinguneqassaaq, matumani pineqartut 5.660 kr.-inik qaffaavigineqarnerinik kinguneqassalluni.

Tamatuma saniatigut malittarisassat allanngortinneqassapput, taamaaliornikkut siusinaartumik pensionisianut ilanngaataangitsumik siusinaartumik pensionisiallip aapparisaatalu aningaasat isertitarisinnaasaattut killiliussa 10.00 kr.-inik amerlineqassallutik.

2. Siunnersuutip Inatsisartunit siullermeerneqarnera

Siunnersuut pillugu pitsaasumik oqallittoqarpoq utoqqarnullu atugassarititaasut pitsannqorsarneqarnissaannut sulineq tapersorsorluarneqarluni.

3. Tusarniaanermi akissuteqaatit

Tusarniaanermi akissutigineqartut inatsisissatut siunnersuummut kakkiunneqarput, tamanna Inatsisartut Siulittaasoqarfiata ilusiliinissamat piumasaqaataanut naapertuuppoq.

4. Siunnersuutip aningaasatigut kingunerisassai

Siunnersuutip piviusunngortinneqarnerani aningaasatigut kingunerisassai siunnersuummut nalinginnaasumik oqaaseqaatini allaaserineqarput. Tassani allassimavoq 2022-imi piviusunngortinneqarnissaanut 2022-imut aningaasanut inatsimmi 15 mio. kr.-inik 2023-ilu aallarnerfigalugu ukiumut 30 mio. kr.-inik immikkoortitsisoqarsimasoq.

5. Apeqquteqaatit

Ataatsimiititaliap siunnersuummik suliarinninnermini atugassaminik apeqqutit arlaqartut akineqarnissaat pillugu Isumaginninnermut Sulisoqarnermullu Naalakkersuisoq ataatsimiititaliamit qinnuigineqarpoq. Ataatsimiititaliap apeqquteqaatai aamma Isumaginninnermut Sulisoqarnermut Naalakkersuisup akissuteqaataasa assilineri isumaliutissiissummut matumunnga ilanngussatut kakkiunneqarput. Tamatuma saniatigut ataatsimiititaliaq Isumaginninnermut Sulisoqarnermullu Naalakkersuisumik ulloq 25. april ilisimatitsiffiusumik ataatsimeeqateqarpoq.

6. Ataatsimiititaliap siunnersuutininik suliarinninnera

Aningaasat utoqqalinersianut tunngaviusut amerlineqarnerat ineqarnermut tapiissutit ilanngarneqarnerannik nassataqassanersoq, taamaalillunilu utoqqalineri pensionisialinnut pitsaangitsumik kinguneqassanersoq, qulaajassallugu suliarinninnerminut atatillugu ataatsimiititaliap soqutigisimavaa.

Utoqqalinersiat toqqammaviusut qaffanneqarnerisa ineqarnermut tapiissutit ikilineqarnerinik kinguneqassasoq Isumaginninnermut Suliffeqarnermullu Naalakkersuisup akissuteqaataani allassimavoq. Naak isumaginninnikkut tunniuttakkat ilanngaavigineqareeraluarlutik utoqqalinersiallit pineqartut tigusartagaat amerlissasut naatsorsuutit takutippaat.

Ineqarnermut aaqqissuusseqqinnissamat, utoqqarnut periusissiasamat aamma angerlarsimaffeqangitsunut periusissiamut atatillugu sulinerup ingerlatiinnarneqarnissaa aamma allassimasoqarpoq. Siusinaartumik pensionisiallit isertitaannut malittarisassat eqqarsaatigalugit inatsimmi allannguinerup siusinaartumik pensionisiallit saniatigut

isertissinnaasaat ilanngaavigineqaratik 10.000 kr.-inik qaffanneqarnerinik aamma kinguneqassaaq. Taamaalilluni inatsisimmi matumani allanngineq ilanngaassisarnermi malittarisassanik allannguinermik kinguneqassanngitsoq Naalakkersuisut akissuteqaataanni allassimavoq.

Ataatsimiititaliap inassuteqaatai

- Ataatsimiititaliami amerlanerussuteqartut Siumut aamma Inuit Ataqatigiit siunnersuutip akuersissutigineqarnissaa inassutigaat

Siumumiik ilaasortaatitat ilassutaasumik ima oqaaseqaateqarusupput:

Nuannaarutigaarput naalakkersuisoqatigiit suleqatigiisummi utoqqaat tamakkiinerusumik aningaasatigut atugaat aaqqiviginiarlugit suliniutinik aallartitsimmata, qilanaaraarput suliniutaasa timalersorlugit suliarilerpatigut suleqataanissatsinnut.

Demokraatiniik ilaasortaatitaq ikinnerussuteqarluni imatut oqaaseqaateqarpoq:

Demokraatiniit utoqqarnut atugassarititat pitsanngorsarnissaannut tunngaviatigut tapersorsorpaat. Taamaattorli aaqqissuusseqqinnissamut isumaqatiginninniarnermi tapiissutitut allanut, soorlu ineqarnermut tapit allanullu isertitaqarnerulernermut nalimmassaassutitut tunngatillugu kalluaassanngitsoq. Naalakkersuisut akissuteqaammini tamanna suliarineqarneranik eqqaasaqanngillat, taamaattumillu utoqqarnut ineqarnermullu periusissiaq kissaatigisattuut naammassineqarnissaa nalorninarartoqarpoq. Naluarputtaa utoqqalineriorsiallit ineqarnermut tapit nalimmassarneqareerpata aningaasat tigummiat qanoq amerlatigisut pigilertassaneraat. Taamaattumik utoqqalineriorsialinnut siusinaartumillu utoqqalineriorsialinnut iluaqutaavallaarnaviannngitsumik illuatungaanillu allaffissorneruliinnarnermut kinguneqartitseratarsinnaasunik aaqqiisoqarsinnaaneramik inissisimasoqarpoq. Isumarput attapparput Naalakkersuisullu peqqullugit isumaqatiginninniarnermi neriorsuutigisimasartik aamma attatissagaat.

Naleqqamik ikinnerussuteqarluni oqaaseqaat.

Ullumikkut utoqqalinersiutaannarnik isumalluuteqartut atugarisaat amerlasuutigut ilungersu-nartumik inissisimapput. ineqarnikkut atugarisat, inuussutissaqarnikkut atugarisat, kalaalimernit akii, nioqutissat akii, aammalu kallerup inneranut imermullu akit, kiisalu kiassarnermut oliamik atuisunut apeqqutaalluinnartarlutik. Tamakku tamaasa eqqarsaatigalugit ullumikkut utoqqalinersiat qaffaatissaat annikippaallaartut pingaartumik utoqqaat utoqqalinersiutaannarnik isumalluuteqartut artornartumik inissisimasarmata.

Naleqqamiit erseqqissumik oqaatigissavarput maannakkut piffissanngormat utoqqartatta atugarisaasa pitsaanerulersinneqarnissaannut aamma utoqqalinersiat annertussusilersorneqarnerat eqqarsaatigalugu massakkumiik annertunerusunik utoqqarnut qaffaasoqartariaqalermat.

Nunatsinni utoqqaat ataqqinartumik atugassaqaassapput. Utoqqalinersiuteqarnermi aappaarneq inuuniarnermut aporfilersuutassaangilaq, aammalu ilaqutariit eqqarsaatigalugit illoqatigiinnikkut isertitat aporfilersuutigineqartariaqanngillat. Ilami massakkut utoqqaat ernguttaminnik imaluunniit qitornaminnik illusimasoqartarnertik aningaasaqarnikkut artornartorsiutigisarmassuk ilaatigut ineqarnermut tapiissutinik piaaffigineqartarlutik.

Utoqqalinermi aappariit isertitaat aallaavigalugit ilaatigut aappaasoq sulippat aappaasoq pillarneqartarpoq annikitsuarsuarnik ilaatigut utoqqalinersiuteqartarlutik. Uffalu ukiorpassuarni inuiaqatigiinni sullissereerlutik utoqqanngornerminni pisinnaattitaaffiarneqartarnertik assut inuttut naleqanngitsutut tunitsinnginnartunngortitaasarnertik artornartorsiutigilersarmassuk.

Taamaattumik qaa utoqqalinersiuteqartarneq ajunngitsumik aaqqiiviginiartigu, taamaaliornikkut aamma ilaqutariit utoqqartallit atugarisaat pitsanngorsassavagut, utoqqaammi ilaqtuminnut isumassuiuartuupput ilaqtanngumik atugarissaarnissaat pisinnaatillutik suleqataaffiguararamikku.

Innuttaasut toqqissisimallutik utoqqalinissaat tamatta anguniarparput, utoqqaat ataqqinartumik inuuneqarnissartik pisinnaatitaaffigaat, utoqqaat atugaasa oqinnerulernissaat tamatta anguniarparput, utoqqaat ikiortariallit ikiorneqassapput aamma angerlarsimaffimminni.

Utoqqalinersiutit qaffanneqarnissaannut 1. januar 2022 aallartiffigalugu atulersinneqassasoq kissaatigisimavarput aammalu annertunerusumik ullumikkut qaffaatissanik annertunerusunik siunnersuuteqarsimalluta. Kisianni tamanna angusinnaasimannngilarput ajuusaarnaraluartumik.

Kisiannili neriorsorneqarnikuuvugut 1.juli 2022 aaqqiinissaq aatsaat atuutilertariaqartoq tassanilu tunngavilersuutigineqarluni ineqarnermut tapissuutit utoqqalinersiat qaffanneqarnissaannut akornutaassanngippata upernaag manna Inatsisartut ataatsimiinnerani inatsisitassai nammasseneqartariaqartut ajuusaarnarluinnartumillu tamanna Naalakkersuisunik naammassineqanngilaq naak arlarleriarlugu apuusseqqittaraluartugut.

Massakkullu toqqaannartumik ilisimannngilarput utoqqalinersiat qaaffatissaat qanoq ineqarnerminnut tapiissutinut sunniuteqassanersut.

Taamaattumik ullumikkornit qaffasinnerusumik utoqqalinersiutinut qaffaanissamik oqaari-artuutigisartakkagut aalajangiusimavagut.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Hans Peter Poulsen
Siulittaasoq

Anna Wangenheim
Siulittaasup tullia

Mikivsuk Thomassen

Eqaluk Høegh

Mala Høy Kúko

Aslak W. Jensen

Emanuel Núko